

SAN PABLO CARTA NYAFYTE FI'JNI TIMOTEO JII

Pablo Timoteo's fi'jni

1 ¹ Andya' Jesucristo jycaajnisá Pablo yaasetj, tyāasa cue'shtyi nwe'wesa Dyus vite' cue'shtyi jype'jsa Jesucristo tyāawe'sh caajnisatj, Jesucristo yuurráa nwe'wewa'ja's pta'shsa. ² Dyus yacj jypumbamée fi'nzesa isa andy nchi'c na'wesa Timoteo's fi'jatstju naa carta's. Dyus cue'sh Tata vite' cue'shtyi jype'jsa Cristo Jesus tyāawe'sh peeygájrra pu'chte!, indya' ewrráa wēt fi'nzenea'nga.

Caapiya'jni ewmeesa's jypa'yacycajn neewe'weni

³ Macedonia quiwen ul'juetsrra!, indya's Efeso chjambtee nvijttju Dyus yuwemée tyāawe'sh ūus yajcyrra fiy caapiya'jsaty yupcajn. ⁴ Tyā'wēme!, tyāawe'sha! Dyus librate yu' fi'jnimeeteva nyafiitey yatsgawe'sha! tyā'wēty yūu jīna yajcyrraty cuentu'ju!, atsa! tyā'wēsaty wēse'cjamén indya' we'wewa'jsang neeyūu. Atsa! tyā'wēsarrá's cuentu'jni! Dyus neewe'werra nvijtcu tyāate yu' le'chcuerráa yujva selpi'tsme!

⁵ Tyāa pa'gatj na'wē yūuwa'jrrá's jycaaja!: puuty ya'peeygāawa'ja's isa īshiimée ūusuj jyuca yajcyna Dyus yacj yuurráa fi'nzewa'ja'stju neewe'we!. ⁶ Maafi yu' tyā'wē peeygāawa'ju tyuteerra cuentu selpiwa'jmeesurráaty puuty we'wena fi'nze!. ⁷ Tyāawe'sha! Dyus libru's jiyuwa'ja's caapiya'jsaty yuu wēje!, nava tyāawe'shírráa yujva jiyu'tsmeeta' peecy caapiya'jni's tyacue wala chjächja we'wetsrrava.

⁸ Jiitja'w Dyus jycaajni leya' ew yuja!, ma'wē jycaatje! cytey yuusáa yacj yu!. ⁹ Ew yūuna fi'nzesaty! Dyus jycaajni leya' tjengwal' jipjme!. Dyus jycaajni leya' na'wēsarráaty tjengwal' jipja!: Dyusna atsesa, Dyusna nwēese'jsamée, ewmeesa, pcalsawe'sh, Dyusna ūucjsamée, Dyus yuwe'sva weechsa, neywe'shtyi icjsa meerrava nasa ma'wēsatyva icjsa, ¹⁰ ptamumey pcal yūuna fi'nzesa meerrava pitstjē'j pwe'sh tyā'wē yūusáa,

nasaty sũtjrra icjsa, ĩshiisa, Dyus uyte isatj we'we' jĩna ĩshiisa. Sa' Dyus yuwemeesurráa tyā'wē puuty we'wena fi'nzeni yu'sa' Dyus leya' yup yuju'c. ¹¹Atsa' andy caapiya'ja'tj tyā' ĩshiinisame', tyāasaí Cristo yuwe ewte nviitwa'jsa's Dyusí andyna neewe'werra nvijtcu tyāáírrá'.

Dyus peeygájrra tyacue ew yũupa'ga wechani

¹²Cue'shtyi jype'jsa Jesucristo's wecha'tj, andya's tyjityrra na'wē selpiwa'jsac nvijt tyajy tashite selpiwa'jsane'tca yu' naa pa'ga. ¹³Andya' nyafíi yu' ajtserra wēeshuuna pcyuuya' pacuesaatj yu'. Nava Dyusa' andya's peeygájrra jypa'gac, jiimeerrane'tca tyā'wē yũuna ũsu' naa pa'ga. ¹⁴Tyāasa cue'shtyi jype'jsa pu'chni' andy yacja' iiméj walasa yu'c vite' Cristo Jesus yacj utyaapa'ga tyajy peeygāanisava tyā'wēycu walasa yu'.

¹⁵Cristo Jesus naa quiwete quíjc pcalsaty nwe'weya' jĩna pta'shni' ĩshiinisame', atsa' tyā'wē pta'shni's nasa jyucaysa isa yujna sũjwa'j ji'pja'. Nava maateva jytjaacue pcalsa' andytju yu'. ¹⁶Macue tyā'wēteva, Dyusa' andya's peeygájrc, andy tyacue ewmeesateva Jesucristo' tyā'wēsa's cjuē'ycu wejy peeygájna jypa'ga sũjcajncu tyā'wē yũu. Atsa' maava andy na'wēy ewmeesa ũsrrava cue'shva ptsumée ĩtyi fi'nzewa'ja's pejca jypa'gayuju'nja'w sũjcajncu tyā'wē yũu. ¹⁷Tyāa pa'ga bagachteva wechana nes yuua'w'j ji'ptja'w jycaajsa ptsuwa'jsame's. Tyā' cue'sh yafyte vyaasame', nava bagachte yujva ptsuwa'jsavame'. Dyus tyāa yuurráa quíjte yujva shiingwa'jsame'.

¹⁸Andy nchi'c na'wēsa Timoteo indya's neewe'wetstju, iindy ũuste ma'wē ew fi'nzewa'ja's ũusutjena tyā'srráa cytey yuuna, ew yũuwa'jrrá's pa'pchuna Dyusa' pu'chjina sũjna fi'nzecajn. Indy tyā'wē ew fi'nzecajnírráaty yacjtjē'jwe'shva dyiicjēy pta'sh Dyus yacj jypumbamée selpiwa'jsa' jĩna atsa' tyā'sa' cytey myuu. ¹⁹Maaíi yu' quíj tyā'wē ewsateva jĩirra, qui' quíj ewmeesateva jĩirrava nwēese'jmeerra, Dyus yacj fi'nzenijũ jypumbaty. ²⁰Tyā'wē yũusa' Himeneo, Alejandro tyāawe'shta'. Atsa' andya' tyāawe'shtyi' echtjē'j cusete nvijttju, cyaj Dyusa's atsewe'weya'mée piyaatyna.

Dyus yacj ma'wē puuty we'wewa'ja'sva caapiya'jni

2 ¹Nyafyte' Dyus yacj puuty we'wewa'ja's cjuē'yjtju neewe'we'. I'cue'sha' nasa jyucaysa pa'gate Dyusa's wechana mneewe'wewe tyāa yacj puuty we'wena, sa' quíj pējyrrava pēywa'ja'. ²Tyā'wēy naa quiwete jycaajna ũssawe'sh jyucaysa pa'gateva Dyus yacj puuty we'wewa'ja', cyaj Dyus pu'chte' tyāawe'sh ew jycaatje', wēt fi'nzeya' āja'nja'w quíjva cuch yuunimée Dyus yacj yuurráa. ³Cue'shtyi nwe'wesa Dyusa' tyā'wē yũuni'scu jytjāasu'. ⁴Tyāa pa'gatey Dyusa' quim yujtyva vitu jytjāasu'tsme', jyucaysa ewsa's jiyurra ewte neeyũuni'scu jytjāasu'. ⁵Tyā'wēme', ewte nviitwa'jsa' tech Dyus yuurráa ũsa', atsa' tyā'wēy

Dyus dyi'pte nasaa ju'ngu yuurra we'we pu'chsava teech írráa ūsa', tyā' Jesucristo' cue'sh cacue's írráa ji'pjsa. ⁶Tyāa Jesucristoc jyucaysa ewte neeyūuwa'ja's vitna pcalsa pa'gate uu tyā'wē yūuwa'j en ājte!. ⁷Atsa' tyā'wē yūuni's pta'shwa'jsa tyjityrra nviitnisatj, Jesucristo jycaajnisaa. Tyāasa andya' īshiinimeesa isasa's caapiya'jwa'jsatj, judiu ji'jmée vite nasava Dyus yacj jypumbamée fi'nzecajn. Tyā'wē caajnisatj jírra' īshijja'tsmeetj tyā'sa' Cristo' jiaa'.

⁸Tyāasatj neewe'we': Nasa msuuwe'shva Dyus yacj puuty we'wewa'j ji'pjta' puiina fi'nzemée Dyus yuurráana ūusuj jyuca yajcyna. ⁹Tyā'wēy u'ywe'shva ropa iijyūni's jypa'yacywa'ja' nasa we'wecajmen. Sa' dycjasa's quindutsrra' tyacue wala vyuu bej qui'pna ew pjeu'jmeeteva ewna. ¹⁰Atjnisava jwee pa'gasa iijyūmeerrava, Dyus yacj ew fi'nzenírráa wejy ewsa', tyāa yacjrráa fi'nzesayā'ja'. ¹¹U'ywe'sha' wala jypa'yacy wēse'jna u'pwa'jsata' caapiya'jni's. ¹²Nasaa cshavyte u'y we'wewa'ja's ūsme'nja, sa' pitstjē'ja's jycaajwa'ja'sva ūsme'nja, wejyva shuuna'rráa u'pwa'jsa'. ¹³Tyā'wē pitstjē'ja's jycaacjamení, Dyusa' Adana's cjuē'yycu pjeu'j, e'suc Eva's pjeu'j. ¹⁴Atsa' Adan ya'īshiini yuume', u'yycu ya'īshii. Tyā'wē ya'īshiirrac pcalte wete. ¹⁵Nava u'ya' peecy luuchtyi ew jype'jna Dyus yacjva jypumbamée ew fi'nzerra', ewte neeyūuna.

Ma'wēsa anciano yūuwa'ja'sva pta'shni

3 ¹Isatj we'we': Maava dyuus yatte jycaajwa'ja's jypa'gasa anciano' mjii ewsa's jypa'gasa yuuna. ²Nava cytee jycaajwa'ja's jypa'gasa' quijte yujva jypumbamée wala ew fi'nzesa yuuwa'ja', ājmée yūute yu'cypejni fi'nzewa'jsame'. Sa' peecy nyuu yacjrráa fi'nzesa yuuwa'ja'; quijteva jyuca jypa'yacy fi'nzesa yuuwa'ja', sa' zhichcue juuna' yuumée fi'nzesa yuuwa'ja'; paandeesaty yat pqui'jna fi'nzesa yuuwa'ja', sa' ewsa's ma'wē caapiya'jwa'ja'sva jyuca jiisa yuuwa'ja'. ³Tūuna fi'nzesa yuuwa'jme' puii jypacuena, vyu cnaywa'jrrá's yajcyna fi'nzesa yuuwa'jme', wejyva vyu's yajcymée peeygājna pu'chna ewrráa yūuna fi'nzesa yuuwa'ja'. ⁴Peecy yattewe'shtyi ew zhichcue jype'jsa yuuwa'ja', sa' peecy luuchva nwēese'jna ew fi'nzecajn caapiya'jsa yuuwa'ja'. ⁵Tyā'wē peecy yattewe'sh yujtyva ew jype'jya' ājameerra', ¿ma'wē Dyus luuch yuutyi' jype'jya' ājacy? ⁶Dyuus yatte jycaajsa' Cristo's u'se jypa'gasa yuuwa'jme'. Tyā'wēme', wala iiwejch yajcyrra ewmeete weteena echtjē'j weteniitey. ⁷Nasa Dyusa's jiimeesa cshavysuva wala ew fi'nzesa yuuwa'ja', tyā'wē echtjē'j cusete weteya'mée, nasa ewmée we'wewe'shte.

Ma'wēsa diácono yūuwa'ja'sva pta'shni

⁸Tyā'wēy dyuus yatte pcjaacjesaty tjeng pu'chsa diaconova Dyus dyi'pte wala ew fi'nzesa yuuwa'ja'. Quij yūuya' puuty we'werrava īshiimée cytey yuusáa yuuwa'ja'. Tūumée fi'nzesa yuuwa'ja', vyuu cnaywa'jrrá's wejy

pa'pchuna fi'nzesa yuwa'jme'. ⁹Dyus yacj fi'nzewa'ja's ew jiisa yuuna sa' ũusteva jypumbamée ũstju sŭjwa'ja's ji'pjusa yuwa'ja'. ¹⁰Ma'wēsateva jiyuya' nyafyte manz en nvijtrra, quijteva ewrráa fi'nzeni's uyrra tyā'wē dyuus yatte pcjaacesaty tjeng pu'chwa'jsa nviitwa'ja'. ¹¹Tyā'wēy u'yva dyuus yatte selpiina fi'nzesa' Dyus dyl'pte wala ew fi'nzesa yuwa'ja', vitesaty nuywe'wemée, quijteva jyuca jypa'yacy ewrráa fi'nzesa yuwa'ja'. ¹²Dyuus yatte pcjaacesaty tjeng pu'chsa diacono' peecy nyuu yacjrráa fi'nzesa yuwa'ja', sa' peecy yattewe'shtyi ew jype'jsa yuwa'ja'. ¹³Tyā'wē diaconowe'sha' tyāawe'sh mji's ew mjiirra', tujtjety fi'nze', sa' Cristo Jesus yacj fi'nzewa'ja's tjaamemée pta'shwa'ja's uyu'ty.

Cue'sh ewte neeyūuwa'ja's quim yujnava caajiyu'jnimeec ũsu'

¹⁴Indy yacj puuty uyya' dund yuwe'nja sŭju'tj, nava meerra' jytjēyuuvá'nja sŭjrra naa carta's fi'jatstju, ¹⁵cyaj Dyus yacj fi'nzesa yacj ew fi'nzeya' ma'wē yūuwa'ja'sva jiyune'nga. Tyāawe'sha' Dyus ityisa luuchta', tyāasaty isa ewsa's nvijtmée tyāate yuurráa fi'nze'. ¹⁶Cue'sh ewte neeyūuwa'ja's quim yujva jiyunimeec ũsu' tyā'sa' Dyusa' caavya'ja'cj tyā' na'wē seena' walasa':

Dyusa' nasaa cacue yacjcu vyaa,

Sa' Dyus Espiritu we'werra': Tyā' quij pcal yujva ji'pjmeesa' jinic yuu. Atsa' Dyus angeleswe'shva uyniisac yuu.

Sa' mtee mteeva jyuca pta'shni yuute',

Naa quiwete msuuwe'shva maaí yu' tyāawe'sh ũuste jypa'gaty.

Tyajú' cielute qui' jypa'ganic yuu.

Dyus tashuj tyuteerra ewmeesarrá's caapiya'jsa

4 ¹Tyā'wē ew āate caavya'ja'jni yuuteva, maaí yu' nmej en yuutste' Dyus tashu tyuteetya echtjē'j ishiina caapiya'jnite fi'nzeya'. Tyā'jīnac Dyus Espiritu' āate pta'shi'. ²Tyāa nasa ishiina caapiya'jsa yuwejurráa ew we'werra', ũuste yu' ech jycaajnirrá's nwēese'jna ewsa yu's nwēese'jsame' ³na'wē jycaajatyna: Cambawa'jme' sa' ũ'tasha's Dyus nvijtcu Dyus nwe'wenisa ewsarrá's nwēese'jsawe'sh Dyusa's wechana ũ'cajn tyāa ũ'a's tyjityrrarráa ũ'wa'ja' jityna. ⁴Tyā'wē yuucajmení Dyus nviitnisa yu' quij ũ'va jyuca ewsa', atsa' ewmeesa' jīmée ũ'wa'ja', ⁵tyāa pa'gaty Dyus yuwete we'werra': Ũ'a' jyuca ewsa' jī'c atsa' ũ'a's jypa'garra' Dyusa's wecharra ũ'te', ewmeesa yu'tsme'.

Jesucristo's wala ew selpisáa

⁶Tyā'wē Dyus yacj fi'nzewa'ja's ũuste yu'acjrra isasarrá's caapiya'jni's ew piyarra yacjtjē'jwe'shtyi caypumba'jmée jype'jrra', Jesucristo's wala ew selpisarra tyā'wē yuune'nga. ⁷Dyus yacj fi'nzewa'jmeerrá's we'weni seelpimeesaty' nwēese'jmée, Dyus yacj fi'nzewa'jrrá's chjächja

mpa'pchu. ⁸Tyā'wēme' cacue chjāchjawa'jrrá's pa'pchute', jwee yu' selpi'tsme'. Nava Dyus yacj fi'nzewa'ja's chjāchja pa'pchunisac wejy jytjaacue selpi'. Tyā'wēsa' naa quiwete ew fi'nzewa'tjec selpi', sa' cieluteva selpiwa'jsaírrá'. ⁹Na'wē pta'shni' íshiinisame', atsa' jyucaysa nwēese'jwa'lj ji'pjta'. ¹⁰Tyāa pa'gaírráatja'w pytjaa ya'iiwēeshuunava chjāchja mjí', tyāa pa'gatey Dyus ityisa úsa' tyā' pu'ch yujuna súju'tja'w, tyā' naa quiwete nasa jyucaysaty nwe'wesa' tyā'sna úuste jypa'gasa yuutyi' jyuca.

¹¹Tyā'wē yúuwa'ja's ew caapiya'jwa'lj ji'pjngu. ¹²Sa' pitstacya' jína weechwe'shte wala ew mfi'nze, cyaj Dyusa's jisawe'sh iindy fi'nzeni's uyrra', tyā'wēy ew fi'nzecajn quijteva úus yajcyrra mwe'we. Sa' tyāawe'shtyí peeygājna mfi'nze, Dyus yacj jypumbamée, quijte yujva pcalte wetemée. ¹³Andy pa'pjcach indya' Dyus yuwe's nasaa cshavyte lēeyna, yu'cypejna caapiya'jna yuuwa'jrrá's pa'pchuna mes. ¹⁴Indy quijteva shiingmée ajawa'ja's Dyusa' úscu ancianowe'sh indya's peequinzerra Dyus yacj puuty we'wete tyāatyí' iviituya'mée wala mpa'yajcy. ¹⁵Tyā'wē ew fi'nzewa'ja's yuurráa pechcanamée mfi'nze, cyaj indya' Dyus yacj jweefírráa chjāchjana u'jni's jyucaysa uyuutyna. ¹⁶Peequí wala mpa'yajcy sa' caapiya'jni'sva tyā'wēy mpa'yajcy quijte yujva shiingmée. Tyā'wē yúurra', indyíiva ewte neeyúune'nga, sa' iindy pta'shni's wēse'jsatyva ewte nviitune'nga.

Dyus yacj fi'nzesaty na'wē yúuna fi'nzewa'ja'

5 ¹Indya' tjé'jsatyi's juuna' we'wena yu'cypejmée, wejyva peeygājna ewrráa myu'cypej, iindy tata na'wē yajcy. Sa' pitstacytyiva iindy nyacjwe'sh na'wē yajcy myu'cypej. ²U'y tjé'jsatyva iindy mama na'wē yajcy ewcuérráa myu'cypej. Sa' cna'sawe'shtyiva iindy npe'sh na'wē yajcy myu'cypej wala jypa'yacy fi'nzena.

³Nmi' uute u'yrráa neeyúusaawe'sh quijva ji'pjmée pejiina ússatyí' mpu'ch. ⁴Nava tyāawe'sha' nchi'c meerra' ntsun ji'pjuvátyna atsa' tyāa ntsun meerrava nchi'c tyā'wē njí'ja's jype'jwa'lj ji'pjta', neywe'sh ma'wēne'ta peeygājna jype'j tyā'wēy yúuwa'lj ji'pjta'. Tyā'wēc Dyusa' jytjáasu'. ⁵Nava nmi' uute' luuch ji'pjmée tyāarráa neeyúusa', Dyus yuurráanaty een isa neewe'wena fi'nze', Dyusa' pu'chjina sújna. ⁶Nava vite' tyā'wē yúumée nmi' uuyā'tje' naa quiwetewe'shrrá's yajcy na' nzesá' uuní' na'wēsaya'tja'. ⁷Áchja' nasa ecajuwe'sh ewmée nuywe'wecajmén, na'wē yúuwa'ja'sva mcaapiya'lj u'yrráa neeyúusáa jil'jty: ⁸Tyā'wē peecy nwe'shtyí jype'jwa'lj ji'pja', sa' peecy yattewe'sh yuutyí' wejy tjaacue tjengwa'lj ji'pja', naa cyaj cytey yuumeerra' Dyus luuchtju sújwa'lj ji'pjme' sa' Dyusa's jiimeesate jytjaacuec yuuwesa yuuna.

⁹Nmi' uute' u'yrráa neeyúusaatyí' pu'chwa'ja', nava sesenta añu ji'pjsa teech nmi' yacjrráa fi'nzesaty tyā'wē pu'chwa'ja'. ¹⁰Tyāawe'sha' bagachteva ew fi'nzesa yuutyna na'wē yúuna: luuch ji'pjsarra' tyāaty

ew jype'jsa yuutyna, yatte pa'jsaty jypa'gasa yuutyna, yacjtjê'ljwe'shtyi peeygãjna pu'chsa yuutyna, ñuste pytjaa yuusaty pu'chsa yuutyna, quijteva jyuca ewrráa yūuna fi'nzesarráaty pu'chwa'ja'.

¹¹Nava sesenta añu ajmée ji'pjsaty' jypa'gawa'jme'. Tyā'wēme', qui' imi'wa'ljrrá's yaacynite Cristo tashu tyuteetyna, ¹²atsa' tyā'wē yūurra' yuuwesa yuutyna, tyā'wē Cristo yacj fi'nzeya' puuty we'weni's e'scjē nviitpa'ga. ¹³Sa' tyā'wēsa' yat iisa pa'jna u'jya' piyaatyna, mjīwa'lj yu'sa' yaacysamée yuuna. Sa' tyā'wērrámée, tyā'wē tyāawe'sh we'wewa'jmeesu jyuca we'we pu'chya' piyarra', yuwee csuus'jsa yuutyna. ¹⁴Tyāa pa'ga nee cna'satey tyāawe'sh nmi' uute', tyāawe'sha' qui' iimi'rra luuch uyrra yatte fi'nzetya, tyā'wē Dyus yacj fi'nzesaty atsesa nuywe'wecajméntju tyā'wē jycaaja'. ¹⁵Tyā'wē yūumeerra maáí yu' Dyusa's pechcanarra echtjê'lj yacj fi'nzena ūsta'.

¹⁶Dyusna jiisa' nchi'c ma'c yuu meerra' niisa ma'c yuu nava maava i'cue'sh nwe'sh tyā'wē u'yrráa neeyūusa's sã'ljina jype'ljwa'lj ji'pji'cue, cyaj dyuus yatte pcjaacjesawe'sha' tyacue tjēysa's uymeetyna tyāa u'lytyi pu'chna, naasáa quij nwe'sh yujva ji'pjmeesarrá's pu'chwa'jsata'.

¹⁷Dyus yuwe's pta'shna caapiya'jna nasaty ew jype'jsa' wala ew pu'chni fi'nzewal'j ji'pjta'. ¹⁸Tyāa pa'gatey Dyus libru' na'wēc pta'shi': Mjīisa buey yuwe's tundnu iūū' mjīicajn jī'c, sa' vite ajcjēva we'werra': Mjīisa' jypa'gawa'lj ji'pja' jī'c.

¹⁹Dyus yuwe's pta'shsaty yuuwesa' jīna nuywe'weni's e'nz meerrava tecj ew jiisa casejmey yu' nwēese'ljnu. ²⁰Nava isa pcalte dyij fi'nzena ūste jiyurra', juuna' mwe'we jyucaysa cshavyte, cyaj vite wēse'ljna ūssa' ūucjrra pcalte fi'nzemeetyna. ²¹Dyus vite' cue'shtyi jype'jsa Jesucristo vite' Dyus angel tyjitynisa tyāawe'sh dyi'pte tyā'wē yūuwa'ja's cajatstju, ajmée yūusaty' jyucaytyi tyāa na'wērrarráa we'wena yu'cypejcajn. ²²Jiyumey yu' quim yujnava dyuus yatte jycaajwa'jsa qui'pnu. Tyā'wē jiyumey jycaajwa'jsa qui'prra', tyajy pcala's sūtj pu'chsa yuune'nga. Quijva ewmeesa yu's jyuca mpa'yajcy.

²³Nava tutyj wala ātsa'ng tyāa pa'ga yuurráa yu'rrá's yu' tundymée, uva yu' pusmeesa yu's le'chcuc mtundy.

²⁴Maáí yu' tyāawe'sh pcala' wala āate ya'ljiyu'ty paapējymeeteva. Nava vite' ya'ljiyu'tsmeeta', tyā'wēsa' nmej ente yã'ljrráa ya'ljiyuna. ²⁵Tyā'wēyetyi ew yūuna fi'nzenisava āate ya'ljiyu', sa' ew yūuna fi'nzenisa dund yu' āate ya'ljiyumeerrava, bagachteva vyaamée yu' neeyūumeetyna.

Dyus yacj fi'nzenisa' naa quiwete ji'pjunit tjaacue walasa'

6 ¹Selpiisá' i'cue'sh patron yacj wala jypa'yacy nwēese'ljna mfi'nzewe, Dyusa's atsewe'weni yuucajmén vite' cue'sh caapiya'jni'sva tyā'wēy ewmée we'wecajmén. ²Sa' selpisaawe'sh i'cue'sh patron maáí' Dyusa's jiisa váa yuuna atsa' tyā'wē cue'sh yacjtjê'lj íírrá' sūjrrarráa le'chcuc

nwēese'jmée fi'nzewal'j j'i'pjmeeta', wejyva jweeírráa ew selpiwal'j j'i'pjta', tyāa pa'gatey Dyusna jiisatyírráa wejy ew pu'chna selpiwal'ja' peeygājna. Tyā'wē yūuwa'ja's pta'shna mcaapiya'j.

³Maafí yu' cue'shtyi jype'jsa Jesucristo caapiya'jni'smée, fiy váa pta'shina cue'sh caapiya'jni'svamée, ⁴sa' tyā' ūuste iiwejch yaacysa quíjva jiimeesarra tyā'wē yuuna. Naasáa tyā' luucu na'wē quíjva seelpimeesurráa we'wena fi'nzesa yuuna atsa' tyā'wē yūupa'gac vitety ewmée yūuwa'j caseje': atseyaacyni, puini, wēeshuni, nasa ewsaty ewmeesata' sūjna fi'nzeni, ⁵puiiwa'j ptsuwa'jmeec caseje', tyā'wē nasa Dyusa's jiimeesawe'sh yacj. Sa' ewmée caapiya'jsawe'sha' Dyus yacj fi'nzeni jīnisa' vyyu cnaynisana sūju'ty. Tyā'wēsa yacja' pcjaacjenu. ⁶Tyā'wē Dyus yacj fi'nzenisa' naa quiwete iiméj wala j'i'pjnisate jytjaacue walasa' quíjva j'i'pjmeerrava wēt fi'nzesa yacj yu'. ⁷Tyāa pa'gatey cue'sha' naa quiwete quíjva j'i'pjmeetja'w pa'j na' quíjva j'i'pjímée caseje'nja'w. ⁸Tyā'wē quíjva j'i'pjmeerrava ū'wa'j vite' atjwa'j ropa tyā'wēsaty j'i'prrarráa wechana fi'nzewal'j j'i'ptja'w. ⁹Nava tyā'wē yaacysame' maafí yu' wala j'i'pju wēenirrá's yaacysa' ewmeetety wete', ewmée yūuwa'jrrá's yaacypa'ga. Sa' tyā'wē yaacynisa' nasaty ewmeete caaivitu'jsarrá'. ¹⁰Tyā'wē vyurrá's wejy tjaacue yaacypa'gaírráac quíjteva jyuca ewmée yūuwa'jrrarráa caseje'. Tyāa pa'ga maafí yu' vyyu j'i'pju wēenirrá's yaacysa' Dyus yacj fi'nzenijū tyuteerra wala ñusterráa fi'nzena ūsta' peequí.

Dyus yuurrá's ūuste pechcanamée yaacywa'ja's mji'pju

¹¹Nava indya' Dyusna nwēese'jsang naa pa'ga tyāa ewmeejū jyuca tyuteerra quíjte yujva jypumbamée Dyusrráana yajcyna vitety peeygājna tjēysa pa'tjeva tyāaty' yajcymée ūusuj jyuca manvijt ewmeesa's. ¹²Dyus yacj tyutemée fi'nzewal'ja'srráa chjächja mpa'pchu, bagachte yujva ptsumée ityi fi'nzewal'ja'srráa yajcyna. Tyā'wē yuucajnírráac Dyusa' pa'ya, atsa' indya' jyucaysa dyi'pte Dyus yacjrráa fi'nze'nja jīnang we'we. ¹³Dyusa' na'wē ityi fi'nzewal'ja's peesu'c quíjquíjrraj ūsna tyāaty jyuca vite' Jesucristova Dyus Nchi'ctju jīna áate pta'shcu Poncio Pilato tashte tyā'wē yuusaawe'sh dyi'pte áchja' indya's jycaajatstju: ¹⁴Andy ma'wē jycaajni's cytey nwēese'jene'nga quíjte yujva jypumbana yu'ptjejmée cue'shtyi jype'jsa Jesucristo quíjpcach. ¹⁵Jesucristo quíiwa'j en ájte', Dyusa' Jesucristo's caavya'jal'jana, tyāa pa'gatey Dyus yuurráa quíjteva jyuca ájawa'jsa tyāa yuurrá', sa' Maa jycaajsateva jytjaacue jytujtjesa', Maateva jytjaacue chjächjasa. ¹⁶Tyāa yuurráa uuwa'jsame', eena' cweetjnite quim yujva utyaaya' ájanimeete ūssa. Tyā'sa' maa pitstjē'j yujva iiuymeetyna sa' áchpcach iiuymeeta'. Tyacue seena' walasa tyāa yuurrá's tuutjel'jni yuwa'ja', bagachte yujva ptsuwa'jmeesa's.

¹⁷Naa quiwete j'i'pjsaty' mwe'we, j'i'pjuwa'jrrá's pa'pchuna iiwejch yajcyna fi'nzeczajmén. Tyā'wēme' j'i'pjunirrá's yaacyni' wala cyulsata',

wejyva Dyusa'srráa yaaquityna, tyãa pa'gatey tyã' ãtyisa', cue'sh quijrraj peejini'sva peejymée jyuca ùssa. ¹⁸Ew yūuwa'jrrá's mcaaj, cyaj tyãawe'sh ew yūunirrás' ji'pjsa yuutyana, sa' tyãawe'sh ji'pjuni's vitety jytyujndeya'va piyaatyna. ¹⁹Tyã'wē yūurra' cielute jypa'gawa'ja's jyaawsa yuurra, bagachte yujva ptsumée ãtyi fi'nzewa'ja's jypa'gasa yuutyana.

Timoteo jypa'yajcy fi'nzewa'ja's neewe'weni

²⁰Timoteo, indyna neewe'weni's mpa'yajcy. We'weni quijva seelpimeesaty' wēse'jnu, sa' Dyus yuwete jytjaacue jiasatja'w jīna weechsatyva nwēese'jnu. ²¹Tyã'wē yūumeerraí maáí yu' tyã'jīna we'wesa yacj u'jsa' jypumbana ũsta' Dyus yacj fi'nzenijū. Tyã'wē yūucajmén, Dyusa' indya's pu'chjina.